

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个佬攞手；難得个放棄日，搵在眠床看日頭輕輕仔徒步、聽窗門外背鳥仔聲唧啾，時間乜像恬恬頓腳咧，啊！這靚靚个朝晨。

食過朝，想去遠久無見个朋友。自家駛車仔，時間就在自家个手頭項，做得慢慢仔行、定定仔奈；經過鬧熱个街市，車輪仔慢慢仔轉入鄉道，來到苗栗个穀倉——灣裡。路个兩片，金黃飽米个禾串仔硬硬會對禾田滄出來哩；風吹來，該一陣一陣歡喜到手攘腳踏¹、搖頭扭腰个金黃稻浪，實在還靚。田脣企等兩個在該比手畫腳个阿伯，日頭晟來，笠嬾下晒到烏刻刻仔个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊野野个禾田，直直透到山下；深深淺淺个黃襯等嫩青个田脣、浸青个大樹，就像係天公伯个調色盤，乜係這個豐收个季節正會有个景色。該向有幾坵仔既經收成忒早冬禾，準備愛過蒔二冬禾个禾田。田水清清清，同朗朗个藍

天、白雲、田脣个樹仔、人家屋，明明明个反映出來，就像係框在田脣做个相框裡肚个相片，實在有罅靚。這向堵好有一坵田還當在該割禾，紅色个割禾機在田肚緊行緊割，三、四儕人在脣項搵手，歡喜个做到無閒泊杈；割禾機後背跔歸陣个白鶴仔，有兜低頭絡食、有兜大步尋食、有兜飛高飛低搶食，鬧熱煎煎，這就係禾田肚盡有生命力个畫面咧啦！

車仔慢慢仔溜入莊頭，伏在路脣个老狗牯看著車仔來，伸懶筋企起來拂尾，就像係迎接老朋友樣仔。一個著花衫个老伯姆跔在屋面前个菜園摘菜，菜園分屋仔蔭等、日頭還吉會晒著，青荷荷个菜葉面還承等露水，看來當萋、當錫人食樣仔。兩個國小年紀个細阿俵仔，一儕定定仔踏等自行車，一儕半行半走、手項拗等籃球，兩儕嘻嘻哈哈有講有笑愛共下去打球仔。這一路个光景，實在分人心情舒爽。

主人家款好一桌點心、番豆同瓜子，還有清香个高山烏龍茶，三、四個真久無見面个老朋友，天南地北講到毋知天合地。茶香、情醜，靚靚个日頭、靚靚个心情，這就係簡單个幸福。

¹ 手攘腳踏：音 su` ngiong` giog` tab；手、腳舞動跳躍。形容非常高興喜悅的樣子。

【頭回蹶大山】范振新原作

「避暑來去蹶百岳，愛無？」就因為這句話，佢俚三兄弟就跔等滿叔，共下去蹶人生个第一座大山。該央時，佢還毋知蹶恁樣个高山有麼个特別，也毋了解蹶三千米以上个山仔愛知得哪兜孔竅，佢這從細戴山肚个半桶水還話著摻頭擺蹶个五指山、石門山這兜淺山仔爭七毋爭八¹，無頭無腦就想跔等去，正經係細和尚仔唸金剛經——毋知頭又毋知尾。

記得該擺蹶个係池有山摻品田山，滿叔安排兩日兩夜。頭暗晡佢兜先歇在武陵農場，第二日打早六點就出發，按算斷烏前行到新達營地。頭下碼正開始蹶該下，佢恅著自家个體力當好，平常時也有運動个習慣，故所行盡遽，想愛早一息仔蹶上山頭。無胚著，正行點零鐘仔就佇毋著吔，歸身仔汗流脈落，強強會故氣毋出。

佢試著盡奇怪，這擺愛蹶山以前，佢還訂工逐日去運動坪練習，仰會還係恁瘥？背尾正知，係因為山頂个氧氣較少，又愛背食糧、滾水、襖婆這兜加加起來完十公斤个東西，身體需要還較

多个能量，正會行一細截仔就故大氣。該載，老弟也同佢共樣，佢緊故大氣緊問滿叔：「會到旨？還有幾遠？」滿叔笑笑仔應講：「還旨得時哦，登山口就還旨到咧！加油！」聽著滿叔恁樣講，佢正經愛嗽無目汁，高不將摻自家个包袱仔擡起來刻耐仔續等行往上。滿叔又講：「毋好行恁遽，山又毋會走忒，定定仔行就好，瘥咧就頓恬下來歇睏，山頂个光景當靚哦！」

斷真，山頂个路彎彎幹幹，毋過見轉一隻彎就有新个天地，在山肚滿哪仔都係好風光，尤其係對面个群山，在半山排遠遠看啊去，一片青里里仔，再加上青天摻白雲不時个變化，每一分鐘、每一秒都像係無共樣个風景明信片。歸路仔還有鳥仔、蟲仔在該唧唧唧唧，佢就在這大自然个音樂會裡肚，一片享受山頂个美景，一片手爬腳蹶繼續行。三不二時還做得看著鷓鴣在天頂飛來飛去，感覺當自在、當自由。就在佢看到慧神發琢呆个時節，忽然間聽著阿哥大嫲牯聲喊：「噯！看著三角點哩啲！」佢煞煞三步做兩步走等上。等蹶到山嶺頂，心肝肚个感動，害佢目汁險險淖出來。

到該下佢正知，蹶大山恁錫人个原因！

¹ 爭七毋爭八：音 zang' qid' m' zang' bad'；差不多。

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該載堵好係梅雨季節，落過雨、起風吔，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩天弓，還鼻得著打馬膠路¹分日頭花煎過、分雨水打過以後淡淡、香香个味緒，臨暗頭窗門外背一陣一陣「揸、揸、揸！揸、揸、揸！」个蟬仔聲順等清風傳入屋肚來。

恁起還細時節，熱燻燻个下晝頭，恁恁多姊妹會摻隔壁鄰舍个細人伴仔共下搞，輒常搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，故所總係暗晡頭八、九點正下班。當記得係堵好該日無伸麼个飯菜，吾爸會自家煮麵食。逐擺佢就摻蒜頭礮礮啊、再剁到幼幼，泔一息仔豆油還過香油，先放在碗公肚，續等摻煮好个麵撈起來，水泌界燥，再同麵倒到碗公，摻麵同蒜頭、配頭攪界勻，該央時係聽著吾爸問：「有麼

人愛食麵無？」佢這兜就盡暢，遽遽飄入灶下，你一口、佢一口，又賺著一餐香噴噴个大麵點心，食到飽餵餵仔，還幸福哪！吾爸同伸个飯菜間等伸無幾多條个大麵，儘採划落肚，就恁樣過一餐。

又還記得，熱天臨暗頭洗好身腳，等到食飽夜，碗筷撿掣，寫好作業，看一下電視，細人仔還細又好搞，差毋多到愛上眠床該下，又一身汗吔；毋過，頭擺屋下無恁好額，淨有一隻間房安有冷氣定定。阿姆會提早半點鐘摻冷氣掣開來，等大家愛睡目該下，間房門打啊開來，涼沁沁个冷氣，還有阿姆拿去晟過日頭个被骨，散出香香个日烈味緒，歸屋下人尖在兩頂眠床頂，黏時就睡落覺咧。

這幸福个滋味一直囿在吾心肝頭，毋多知仔成人長大、做人阿姆以後，正知「賺錢可比針挑笏，使錢可比水推沙。」正體會著爺哀頭擺辛苦畜大佢這兜恁多个細人仔、愛理一個家哪有恁該？毋過該愛盡个責任摻義務，佢兜從來都毋識放忒過。

¹ 打馬膠路：音 da` ma` gau` lu；柏油路。